



UNIVERSITETI - UNIVERSITY - UNIVERZITET
"HAXHI ZEQA"

	REPUBLIKA E KOSOVËS REPUBLIKA KOSOVA MINISTRIA E ARSIMIT, SHKENCËS DHE TEKNOLOGJISË	UNIVERSITETI UNIVERZITETI "HAXHI ZEQA" PEJË	
REKTORATI			
Nr. / Br. / No.	<u>369</u>	Nr. i faq/ Br. str / No. pg	<u>15</u>
Data / Datum / Data	<u>18.02.2020</u>	Pejë / Poë	

SENATI

Ref.

Datë:

RREGULLORE PËR STUDIMET E DOKTORATURES

Pejë, 2020

PËRMBAJTJA

- I. Preambula
- II. Qllimi i Studimeve
- III. Parimet
- IV. Dispozitat e përgjithshme
- V. Objektivat
- VI. Mësimi dhe Hulumtimi në Studimet e Doktoraturës
- VII. Format e Studimeve të Doktoraturës
- VIII. Kushtet e Regjistrimit dhe Kohezgjatja e Studimeve
- IX. Fazat e Studimeve të Doktoratures
- X. Mentorimi
- XI. Obligimet e Mentorit
- XII. Obligimet dhe të Drejtat e Doktorantit
- XIII. Punimi i Doktoraturës
- XIV. Procedura e paraqitjes, vlerësimit dhe pranimit të Temes, kërkimit të Doktoraturës
- XV. Publikimi dhe ruajtja e punimit të Doktoratës
- XVI. Promovimi
- XVII. Mënyra e Sigurimit të Cilësisë në Studimet e Doktoratës
- XVIII. Dispozitat Kalmitare

Në mbështetje të Ligjit nr. 04/L-037 për Arsimin e Lartë në Republikën e Kosovës neni 10 paragrafi 1, dhe në nenin 48 pika 1.8 të Statutit të Universitetit "Haxhi Zeka" në Pejë, Senati i këtij universiteti, në mbledhjen e mbajtur më 18. 02. 2020 miratoi;

RREGULLORE
per studimet e doktorates

Neni 1

Dispozitat e Pergjitheshme

Me Rregulloren për studime të doktoratës (në vazhdim: Rregullorja), në Universitetin "Haxhi Zeka" në Pejë, rregullohet organizimi dhe realizimi i studimeve të doktoratës në Universitetin "Haxhi Zeka" në Pejë (ne vazhdim: Universiteti), institucioni përgjegjës për organizimin e studimeve (ne vazhdim: institucioni përgjegjës i studimeve), format dhe kohëzgjatja e studimeve, kriteret për regjistrim në studime, mënyra e realizimit të studimeve, mësimi dhe hulumtimi, procedura e paraqitjes, e vlerësimit dhe e mbrojtjes se punimit të doktoratës, të drejtat dhe obligimet e studentit në studime të doktoratës (në vazhdim: doktoranti), të drejtat dhe obligimet e mentorit, mënyrat e sigurimit të cilësisë, si dhe çështjet e tjera qe kane të bëjnë me organizimin dhe realizimin e studimeve të doktoratës.

Me këtë Rregullore përcaktohen kriteret e domosdoshme për çështjet e përmendura në paragrafin 1 të këtij neni.

Qëllimet e studimeve të doktoratës

Neni 2

Qëllimet e studimeve të doktoratës janë:

1. Krijimi i diturive, njohurive dhe praktikave artistike të reja dhe relevante, si dhe zbatimimi i tyre;
2. Arsimimi i hulumtuesve dhe i studiuesve të dalluar në fusha të caktuara shkencore/ artistike;
3. Aftësimi i doktorantëve për pune të pavarur kërkimore/artistike, për hulumtime të pavarura dhe për vlerësime kritike të punës se të tjerëve.
4. Arritja e diturive, e përvojave dhe e shkathtësive, të cilat duhet t'u mundësojnë doktorëve të shkencave që në mënyrë kreative dhe të mbështetur në hulumtime t'i zgjedhin problemet komplekse shoqërore dhe ekonomike;
5. Ndërkombëtarizimi i punës kërkimore/artistike në Universitet. Ndryshim i Renditjes sipas Udhezimeve per hartimin e akteve nenligjore.

Perkufizimet

Neni 3

Kuptimi i disa nocioneve sipas kësaj Rregulloreje:

1. Ne nivel të Universitetit është Këshilli qendror i studimeve te doktoratës,
2. Këshilli i studimeve të doktoratës, në nivel të njësisë akademike (fakultetit), është Këshilli i studimeve të doktoratës i njësisë akademike
3. Ne fillim formohet Këshilli i perkohshem i studimeve të doktoratës i njësisë akademike nga te gjithë profesoret ne studimet e doktorates, nje student dhe koordinatori i zyres se doktorates, e pas nje viti pune zgjedhet Këshilli i studimeve të doktoratës i njësisë akademike, nga nje numer prej 5-7 anëtarësh nga radhët e profesorëve nga secili departament i njësisë akademike dhe një student i studimeve të doktoratës. Mbledhjen e pare (konstituive) e fton

- dhe e udhëheqë dekani i njësisë akademike. Pas konstituimit të Këshillit të studimeve të doktoratës, Këshilli nga radhët e veta e zgjedh kryetarin..
4. Këshilli qendror i studimeve të doktoratës e ka këtë përbërje
- Rektori;
 - Prorektori për mësim dhe kërkime shkencore;
 - Një përfaqësues nga Akademia e Shkencave dhe e Arteve e Kosovës;
 - Një profesor i rregullt ose një profesor i asocuar nga lëmi i shkencave bio teknologjike
 - Një profesor i rregullt ose një profesor i asocuar nga lëmi i shkencave të Biznesit
 - Një profesor i rregullt ose një profesor asocuar nga lëmi shkencave juridike;
 - Një profesor i rregullt ose një profesor asocuar nga lëmi shkencave të turizmit
 - Një profesor i rregullt ose një profesor i asocuar nga lëmi i arteve.
 - Një student i studimeve të doktoratës
 - Drejtori i Zyres Qendrore të studimeve të doktoratës, pa të drejte vote.
- 4.1. Anëtarët e Këshillit qendror të studimeve të doktoratës i propozon Rektori dhe i zgjedh Senati.
- 4.2. Këshillin qendror të studimeve të doktoratës e kryeson Rektori.
5. Institucion përgjegjës i studimeve është një a më shumë njësi akademike ose një a më shumë Universitete brenda dhe jashtë vendit, të cilat organizojnë dhe realizojnë studime të doktoratës dhe e përfundojnë procedurën e arritjes së doktoratës shkencore/artistike.
6. Drejtatori i zyrës qendrore të studimeve të doktoratës dhe Koordinatori i zyrës së studimeve të doktoratës në njësi akademike, është një nga anëtarët e stafit akademik të punësuar me orar të plotë, me titull shkencor-mësimor, artistik-mësimor ose me titull shkencor në fushën akademike në të cilën zhvillohen studimet.
7. Mentori është personi i emëruar, me titull shkencor-mësimor ose artistik-mësimor, i cili e udhëheq doktorantin gjatë punimit të disertacionit të doktoratës,
8. Dosja e doktorantit është dosja e cila i përmban të gjitha shënimet qenësore të doktorantit, prej momentit të pranimit të tij e deri të promovimi. Njësia akademike përkatëse është përgjegjëse për mbledhjen dhe për ruajtjen e të dhënave në dosje sipas formularëve të hartuar.

Neni 4

1. Studime të doktoratës ofrojnë njësitë akademike (fakultetet) dhe/ose Universiteti/universitetet në një a më shumë lëmenj shkencore, nëse kanë kontratë të nënshkruar për marrëdhënie pune me orar të plotë me më së paku gjysmën e numrit të mësimdhënësve të angazhuar në atë program studimi.
2. Karakteristikat themelore të studimeve të doktoratës në Universitet janë hulumtimi dhe të mësuarit nëpërmjet hulumtimit, ndërkombëtarizimi, transparencja, vlerësimi ndërkombëtar i cilësisë dhe konkurrenca ndërkombëtare.
3. Me qëllim të sigurimit të cilësisë dhe nxitjes së lëvizshmërisë së doktorantëve dhe të mësimdhënësve, studimet e doktoratës janë të hapura për çdo formë të bashkëpunimit me institucione të ngjashme brenda dhe jashtë vendit.

Mësimi dhe hulumtimi në studimet e doktoratës

Neni 5

1. Komponenti thelbësor i studimeve universitare të doktoratës është kërkimi dhe krijimi shkencor/artistik.
2. Format e punës në studimet e doktoratës janë seminarët kërkimore, punëtoritë dhe grupet e diskutimit, me qëllim të zhvillimit të punës kërkimore, mendimit kritik, përvetësimit të metodologjisë dhe shkathtësive të përgjithshme.
3. Mësimi në forme të ligjëratave nuk bën ta kalojë 20 përqindëshin e ngarkesës së përgjithshme të parapare me programin e studimeve dhe të llogaritur sipas sistemit evropian të transferimit të krediteve (ECTS).
4. Si pas mundësive dhe në baze të kushteve të përcaktuara paraprakisht, ndjekja e mësimave në studimet e doktoratës është e hapur për të gjithë doktorantët e Universitetit. Disa pjesë të kërkimeve dhe të mësimit në studimet e doktoratës mund të ndiqen edhe nga doktorantët e Universiteteve të tjera, sipas kushteve të parapara në kontratën e nënshkruar paraprakisht ndërmjet Universiteteve në fjalë.
5. Me qëllim të arritjes së interdisiplinaritetit dhe në baze të arsyeshmërisë dhe pëlqimit të mentorit, si dhe të pëlqimit të Këshillit të studimeve të doktoratës, sipas nenit 3 të kësaj rregulloreje doktorantët mund të kryejnë pjesë të caktuara të kërkimit dhe të krijimtarisë artistike edhe në njësitë e tjera akademike të Universitetit ose në institucione të tjera përkatëse brenda dhe jashtë vendit.
6. Këshilli i studimeve të doktoratës mund t'u caktojë doktorantëve lëndë plotësuese për arritjen e diturive themelore, të domosdoshme për vijimin dhe për përfundimin e studimeve.

Format e studimeve të doktoratës

Neni 6

1. Studimet e doktoratës mund të organizohen në njërin prej këtyre formave:
 - a. Studimet e doktoratës për të cilat institucion përgjegjës është vetëm një njësi akademike ose Universiteti;
 - b. Studimet e përbashkëta të cilat i realizojnë dy a me shumë universitete,
 - c. Modeli në të cilin doktoranti i regjistron studimet në një Universitet dhe e merr diplomën e institucionit përgjegjës të studimeve, ndërsa kërkimet i kryen në me shumë institucione dhe mund të ketë bashkë mentorë
 - d. Studimet e përbashkëta janë program i akredituar i dy ose me shumë universiteteve; secili universitet merr pjesë në regjistrimin e doktorantëve, ndërsa doktoranti mund të fitojë diplome të vetme të dy ose me shumë Universiteteve, ose diplomën e Universitetit në të cilin i ka regjistruar studimet e doktoratës, e në të cilën shkruan se studimet kanë qenë të përbashkëta.
2. Nuk lejohet transferimi i studimeve të doktoratës nga një njësi akademike në tjetrën brenda Universitetit "Haxhi Zeka" në Pejë, e as nga universitetet e tjera në Universitetin "Haxhi Zeka" në Pejë. Studentet pranohen vetëm në baze të një konkurrimi në konkurs të shpallur nga Universiteti "Haxhi Zeka" në Pejë.

Kushtet e regjistrimit dhe kohëzgjatja e studimeve

Neni 7

1. Kushtet e regjistrimit i përcakton Senati i Universitetit, në pajtim me këtë Rregullore.
2. Konkursi publik për regjistrim në studime të doktoratës shpallet më së paku një muaj para fillimit të vitit akademik. Të drejtë konkurrimi për regjistrim në studimet e doktoratës kanë:
 1. Të diplomuarit para hyrjes në fuqi të studimeve sipas Deklaratës së Bolonjës, të cilët duhet të jenë magjistra të shkencës përkatëse;
 2. Të diplomuarit pas hyrjes në fuqi të studimeve në baze të Deklaratës së Bolonjës - niveli i studimeve Master;
 3. Të diplomuarit që kanë së paku 300 kreditë ECTS.

Kriteret e vlerësimit të kandidatëve përfshijnë:

- 3.1. suksesin në shkollimin gjatë studimeve, nota mesatare 8 e më lartë në të dy nivelet.
- 3.2. interesin e treguar për kërkime shkencore/artistike,
- 3.3. punimet e botuara,
- 3.4. rekomandimet e dy profesorëve nga lëmi përkatës.
- 3.5. propozimin e hulumtimit nga lëmia

Intervista me kandidatin është obliguese dhe është pjesë përbërëse e procedurës së vlerësimit. Gjatë regjistrimit përcaktohen qartë të gjitha kushtet e domosdoshme për përfundimin e studimeve në kohën e parapare.

Përparësi kanë kandidatët që e njohin gjuhën angleze

4. Kriteret e përcaktimit të përparësisë në radhitje përzgjedhëse janë:
 - 4.1. nota mesatare gjatë studimeve paraprake,
 - 4.2. publikimet nga fusha e studimeve në të cilat konkurren kandidati,
 - 4.3. pjesëmarrjet në konferenca shkencore,
 - 4.4. specializimi nga lëmi i ngushtë me fushën e studimeve në të cilën konkurren kandidati (shkencat e mjekësisë),
 - 4.5. njohja e gjuhës angleze (në raste të programeve specifike, kriter i përcaktimit të përparësisë në radhitje mund të jete edhe ndonjë gjuhë tjetër) etj.
5. Këshilli i doktoratës së njësisë akademike e propozojnë numrin e studenteve për regjistrim (kuotën e pranimit), ndërsa Senati, me propozimin e Këshillit qendror të studimeve të doktoratës, e merr vendimin përfundimtar për numrin e studenteve, duke pasur parasysh kapacitetet hulumtuese, mësimore dhe mentoriale të njësisë akademike.
6. Senati i Universitetit, me propozimin e njësisë akademike dhe pas shqyrtimit në Këshillin qendror të studimeve të doktoratës, e merr vendimin përfundimtar për pranimin e studenteve në studimet e doktoratës. Emrat e kandidateve të pranuar, me të gjitha të dhënat e kriterëve të përzgjedhjes shpallen publikisht në ueb faqen e njësisë akademike dhe në ueb faqen e Universitetit.
7. Studimet e doktoratës zgjasin jo më pak se tre vjet por, për shkak të arsyeshme e për të cilat vendos Këshilli qendror i studimeve të doktoratës, me propozim të njësisë akademike mund të vazhdojnë deri në gjashtë vjet.
8. Në rast se një kandidat për doktoratë nuk arrin të përfundojë me sukses arsimin e doktoratës, Universiteti Haxhi Zeka lëshon një certifikatë e cila do të raportojë për kurset që kandidati i mbaroi me ECTS kreditë përkatëse dhe kohën që ai kaloi në kërkime shkencore.

9. Ne rast se cilësia e punimit të doktoratës, e vlerësuar me raportet vjetore te progresit te cilat i zbaton Këshilli i studimeve te doktoratës, nuk i plotëson kriteret e parapara, Këshilli i studimeve te doktoratës mund t'i propozojë Këshillit te njësisë akademike, e ky Senatit, te marre vendim qe doktorantit t'ia marre te drejtën për t'i vazhduar studimet.
10. Me qëllim të rregullimit të çështjeve të mondhme kontestuese, gjatë studimeve të doktoratës nënshkruhet Kontrata midis Universitetit Haxhi Zeka, student të Doktoratës dhe mentorit(mentorëve).

Struktura dhe fazat e studimeve të doktoratës

Neni 8

Studimet e doktoratës organizohen në gjashtë semestra duke pasë parasysh:

1. Programi i Doktoratës duhet të bazohet në kërkime shkencore, ai mund të ketë lëndë mësimore dhe veprimtari të tjera që kontribuojnë në të menduarit kritik dhe përkthimin e njohurive.
2. Programi i Doktoratës duhet të ketë strukturë të qartë dhe afatin kohor (3 deri në 4 vjet për studentë të rregullte të doktoraturës).
3. Programi nuk duhet të jetë i strukturuar tepër; duhet të lejojë rrugën individuale; kurse nuk duhet të kalojë 1/5 e ECTS (36 kredite); programi duhet të ketë trajnime të aftësive të transferueshme, trainim të mjaftueshëm në etikën e hulumtimit dhe integritetit të kërkimit dhe metodologjinë e kërkimit.
4. Programi duhet të lejojë lëvizshmëri-mobilitet dhe pjesë të trajnimit në një institucion tjetër.
5. Programi duhet të ketë një proces monitorimi, pas përparimit të kandidatit për doktoratë.
6. Në semestrin e parë studenti akumulon 30 kreditë ECTS, nga disa provime dhe aktivitete kërkimore-shkencore. Provimet duhet të janë të lendeve metodologjike të kërkimit cilësor dhe sasior, të integritetit hulumtues shkencor dhe të etikës në kërkimin shkencor si dhe një lëndë profesionale nga fusha e ngushtë e drejtimit të cilin e ka regjistruar.
7. Në semestrin e dytë studenti i grumbullon 30 kreditë ECTS nga seminarët e disa lëndëve të zgjedhura nga grup lëndet e regjistruara, si dhe aktiviteteve tjera kërkimore-shkencore të zbërthyer në orë të angazhimit të studentit barazvlerësohen me ECTS kredi.
8. Ne semestrin e trete studenti i grumbullon 30 kreditë ECTS, pas vlerësimit pozitiv dhe ratifikimit te projekt-propozimit te doktoratës nga ana e Këshillit te doktoratës te njësisë akademike dhe e Këshillit qendror për studime te doktoratës dhe pas emërimit te mentorit nga Senati i Universitetit, si dhe aktiviteteve tjera kërkimore-shkencore të zbërthyer në orë të angazhimit të studentit barazvlerësohen me ECTS kredi.
9. Ne semestrin e katërt studenti i grumbullon 30 kreditë ECTS, pas publikimit te një pjese te rezultateve te doktoratës ne një reviste me recension ndërkombëtar nga lëmi përkatës apo pjesëmarrje me prezantim ne tubime shkencore (konferenca, kongrese etj.) me karakter ndërkombëtar, si dhe aktiviteteve tjera kërkimore-shkencore të zbërthyer në orë të angazhimit të studentit barazvlerësohen me ECTS kredi.
10. Ne semestrin e pestë dhe te gjashte studenti i grumbullon 60 kreditë ECTS, me rastin e mbrojtjes publike te punimit te doktoratës, si dhe aktiviteteve tjera kërkimore-shkencore të zbërthyer në orë të angazhimit të studentit barazvlerësohen me ECTS kredi.

Mentorimi

Neni 9

1. Te drejte për te udhëhequr kandidatet për doktorate ka:
 - a. Mësimdhënësi me titull akademik profesor i rregullt (prof. dr.) ose profesor i asocuar (prof. asoc.) që është në marrëdhënie të rregullt pune në UHZ.
 - b. Përrjashtimisht, me kërkesë të Këshillit të Fakultetit për mentor mund të angazhohet edhe mësimdhënësi me titull akademik profesor asistent (prof. ass.), nëse ka se paku tre vjet përvojë hulumtuese pas mbrojtjes së doktoraturës dhe së paku tri (3) punime të botuara në revista me recension ndërkombëtar, Dëshmia për publikimin e punimeve duhet të silllet në Këshillin qendror të studimeve të doktoratës.
 - c. Mentor, në rast të veçantë, mund të jetë edhe profesor emeritus, ndërsa vendimin për këtë e merr Senati, me propozim të Këshillit të doktoratës të njësisë akademike ne kuadër të së cilës organizohen studimet ose të këshillit të lëmit shkencor.
2. Mentori, pa përjashtim, duhet të jete nga fusha e ngushte shkencore nga e cila përgatitet doktorata.
3. Nëse ka bashkë Mentor te jashtëm, ai duhet ta dorëzojë paraprakisht një CV ne Këshillin e doktoratës se njësisë akademike.
4. Një mentor mund te udhëheqë njëkohësisht deri në tre kandidatet.
5. Mësimdhënësi i një njësie akademike te Universitetit "Haxhi Zeka" në Pejë (UHZ) mund te jete mentor ne ndonjë universitet tjetër nëse ka leje nga njësia akademike, me propozim te njësisë akademike dhe me miratimin e Senatit.
6. Për mentor nuk mund te propozohet profesori i pensionuar, përjashtimisht profesorët emiretus.
7. Mentori i cili është emëruar ne këtë funksion para se te pensionohet ka te drejte ta kryeje mentorimin deri ne fund.
8. (8)Për te siguruar cilësi te punimit te doktoratës, ne rast se është nevoja (p.sh. hulumtimi ndërdisiplinor, zhvillimi i kërkimit apo i krijimit artistik ne disa institucione), është i obliguar mentorimi i dyfishte.

Obligimet e mentorit

Neni 10

1. Mentori e ka obligim qe ta udhëheqë doktorantin gjate punës se punimit te doktoratës, ta përcjellë cilësinë e punës se doktorantit, ta përkrahë publikimin e punimeve te tij, si dhe t'i mundësojë pjesëmarrjen ne projekte shkencore dhe artistike, sipas mundësisë.
2. Ne rast se janë më shumë se një mentorë, secili prej tyre i mban përgjegjësitë e veta për pjesën e hulumtimit te përcaktuar paraprakisht dhe për procedurën e punës ne punimin e doktoratës.
3. Mentori e ka obligim qe një here ne vit t'i paraqesë raport për punën e doktorantit Këshillit për studime te doktoratës te njësisë akademike, ne formular te Universitetit.

Obligimet dhe të drejtat e doktorantit

Neni 11

1. Doktoranti është i obliguar qe një here ne vit, ne formular te Universitetit, t'ia paraqesë Këshillit te studimeve te doktoratës raportin për punën e tij (me mundësi te prezantimit te hulumtimit).

2. Doktoranti ka te drejte qe vetëm një here gjate studimeve ta ndërrojë mentorin ose temën, ne baze te kërkesës me shkrim, si dhe te deklaratës se mentorit te deriatëhershëm, ne formular te Universitetit.
3. Doktoranti është i obliguar qe para mbrojtjes se punimit te doktoratës ta ketë te botuar se paku një punim shkencor me recension ndërkombëtar dhe me faktor impakti (IF), i cili është pjese e rezultateve te hulumtimit te doktoratës (ne te cilin është autor i pare ose i dyte) ose te ketë promovim publik te veprës artistike ne hapësira publike. Çdo punim mund ta kualifikoje vetëm një doktorant.

Punimi i doktoratës

Neni 12

1. Punimi i doktoratës është punim origjinal shkencor/artistik, i cili i nënshtrohet vlerësimit publik shkencor/artistik.
2. Përjashtim nga kjo procedure janë punimet e veçanta te doktoratës, siç i parashikon neni 19 i kësaj Rregulloreje.

Neni 13

Format e punimit te doktoratës janë:

1. Monografia;
2. Punimi i doktoraturës është një koleksion i artikujve të botuar, artikuj të pranuar për botim, me ç'rast materiali i botuar paraqet një koleksion të materialit akademik në një fushë të veçantë me prezantimin dhe përfundimin e tij.
3. Punimi i doktoratës ne lëmin artistik është hulumtim artistik origjinal ne kontekst te krijimtarisë bashkëkohore artistike dhe mbaron me prezantimin e veprës artistike dhe me një punim teorik adekuat.
4. Format e tjera konform deklaratës së Bolonjës

Neni 14

1. Punimi i doktoratës duhet te jete i shkruar ne gjuhen shqipe. Ne raste te veçanta ai mund te shkruhet edhe ne ndonjë gjuhe tjetër, por detyrimisht te dorëzohet i përkthyer edhe ne gjuhen shqipe.
2. Titulli, abstrakri, rezymeja dhe fjalët kyçe te punimit te doktoratës, përveç ne gjuhen burimore, duhet te jene te shkruara patjetër edhe ne gjuhen shqipe dhe ne gjuhen angleze. Rezymeja duhet te mundësojë te kuptuarit e qëllimit te punimit, te metodave te hulumtimit, te rezultateve dhe përfundimeve.
3. Pamja grafike e punimit te doktoratës përcaktohet nga Universiteti.

Procedura e paraqitjes, e vlerësimit dhe e pranimit te temës (projektit) te kërimit te doktoratës

Neni 15

1. Gjate vitit te pare te studimeve te doktoratës doktoranti e propozon mentorin dhe temën, si dhe para marrëveshjen e kushteve te punës, dhe, eventualisht, kushtet e financimit te hulumtimit.
2. Doktoranti e fillon procedurën e paraqitjes se projekt-propozimit te temës se doktoratës me dorëzimin e fletëparaqitjes, e cila i përmban shënimet personale te doktorantit, jetëshkrimin dhe titullin e temës se propozuar, te dhënat për mentorin e propozuar dhe

kompetencat e tij, arsyesh mërinë e temës dhe pritjet e kontributit shkencor origjinal te hulumtimit te propozuar, vlerësimin e shpenzimeve te hulumtimit, si dhe deklaratën se nuk ka paraqitur punim doktrate me te njëjtën temë ne studime te tjera Universitare, përkatësisht ne ndonjë Universitet tjetër. Tema e punimit te doktoratës paraqitet ne formular te Universitetit.

3. Këshilli i njësisë akademike, me propozim te Këshillit te studimeve te doktoratës, e emëron komisionin për vlerësimin dhe përshtatshmërinë e temës dhe propozimin e mentorit ne afat prej një muaji nga data e protokollimit te kërkesës se parashtuar. Ky komision përbëhet prej tre ose pese anëtarësh, nga te cilët se paku një anëtar nuk duhet te jete mësimdhënës i studimeve ne fjale e as i punësuar ne njësinë akademike (fakultetin), e cila është përgjegjëse e studimeve. Mentori i propozuar preferohet që të mos jetë anëtar i Komisionit Vlerësues.
4. Komisioni për vlerësimin e temës e jep vlerësimin për kontributin shkencor/artistik origjinal dhe për zbatueshmërinë e kërkimi ne pikëpamje financiare dhe organizative, si dhe e bën propozimin e mentorit me se largu një (1) muaj pas paraqitjes se kërkesës,
5. Këshilli i studimeve te doktoratës i njësisë akademike duhet doemos ta shqyrtoje propozimin e komisionit për vlerësim te temës dhe propozimin e mentorit ne semestrin e trete te studimeve te doktoratës.
6. Projekt-propozimi i punimit te doktoratës mbrohet para Këshillit te studimeve te doktoratës te njësisë akademike, para komisionit për vlerësim dhe mentorit te propozuar, 15 dite pas dorëzimit te raportit te komisionit për vlerësim.
7. Këshilli i doktoratës i njësisë akademike, me propozim te Këshillit qendror te studimeve te doktoratës, ia propozon temën dhe mentorin për miratim Senatit te Universitetit. Senati merr opinionin e Këshillit Qendror të Studimeve të Doktoratës duhet ta shqyrtoj temën dhe mentorin me se largu dy muaj nga pranimi i kërkesës nga njësia akademike.
8. Vendimi i Senatit mund:
 - 8.1. të pranojë propozimin origjinal,
 - 8.2. të kërkoj nga kandidati që të zgjerojë apo ndryshojë temën
 - 8.3. të kërkojë nga Këshilli i njësisë akademike të propozojë tjetër mentor
9. Te gjitha hulumtimet shkencore ne njerëz dhe me njerëz ose me shtaze doemos duhet te jene ne pajtim me dispozitat e Rregullores se Këshillit Etik, duhet ta kenë lejen e Këshillit etik te fakultetit apo Universitetit, si dhe te institucionit ne te cilin zbatohet hulumtimi; pëlqimin e te gjithë te hulumtuarve veç e veç pacienteve, përkatësisht vullnetareve), nëse janë ne gjendje te afte ta bëjnë këtë, përkatësisht te kujdestareve te tyre ose te përfaqësuesit ligjor te tyre.

Procedura e vlerësimit të punimit të doktoratës

Neni 16

1. Punimin e doktoratës, me pëlqimin dhe mendimin e mentorit te shkruar dhe te nënshkruar për hulumtimin e kryer dhe kontributin e arritur shkencor origjinal, doktoranti e dorëzon zyrtarisht ne fakultet ose ne Universitet (nëse studimet organizohen ne nivel Universiteti). Ne rast se mentori nuk pajtohet ta japë pëlqimin, e ka obligim qe brenda 15 ditësh ta japë me shkrim arsyetimin. Pas kësaj periudhe, ne afat prej 15 ditësh pas dorëzimit te arsyeshmerise se mentorit, Këshilli për studime te doktoratës i njësisë akademike e shqyrton arsyeshmerinë e mentorit dhe i propozon këshillit te njësisë

- akademike formimin ose refuzimin e emërimit te komisionit për vlerësimin e punimit te doktoratës. Ne te dyja rastet, arsyeshmëria e mentorit u jepet anëtarëve te komisionit për vlerësimin e punimit te doktoratës, te cilët do ta kenë parasysh gjate vlerësimit.
2. Para se te dorëzohet punimi ne procedure për vlerësim, shërbimi i studimeve te doktoratës i njësisë akademike duhet ta vërtetojë me shkrim se doktoranti i ka kryer te gjitha obligimet ashtu siç është parapare me programin e studimeve te doktoratës.
 3. Për vlerësimin e punimit doktoranti e paraqet punimin ne forme te shkruar ne letër dhe ne forme elektronike. Te veprat artistike te doktorantit, pos prezantimit publik, doktoranti e dorëzon edhe pjesën teorike, si dhe dokumentacionin përkatës për vlerësimin e punimit.
 4. Këshilli i njësisë akademike, me propozim te Këshillit te studimeve te doktoratës, e emëron komisionin për vlerësimin e punimit te doktoratës. Komisioni i ka tre ose pese anëtarë. Inkurajohet përfshirja e se paku një anëtar nga ndonjë Universitet jashtë Kosovës. Mentori nuk mund te jete anëtar i komisionit për vlerësimin e punimit.
 5. Anëtarët e komisionit për vlerësimin e punimit te doktoratës patjetër duhet te kenë se paku titullin akademik profesor asistent (prof. ass.).
 6. Njëherazi me emërimin e komisionit për vlerësimin e punimit te doktoratës, Universiteti e shpall titullin dhe rezymenë e punimit ne gjuhen shqipe dhe ne anglishte ne faqet e internetit te Universitetit dhe ne këtë mënyrë mundëson qe punimi t'i nënshtrohet kritikës shkencore dhe profesionale.
 7. Anëtarët e komisionit për vlerësimin e punimit te doktoratës dhe te gjithë ata te cilëve u është mundësuar shqyrtimi i punimit te doktoratës janë te obliguar qe para se te paraqitet publikisht vlerësimi te kenë kujdes me te dhënat dhe te arriturat ne punimin ne fjale, me qellim te ruajtjes se kontributit shkencor te punimit te doktoratës si prone intelektuale.
 8. Komisioni vlerësues i tezës së Doktoratës, është i obliguar të vlerësoj për çdo lloj sjelljeje të pahijshme ose çështje etike, si dhe plagjiaturë, fabrikim të të dhënave, etj. Disa veprime që nuk lejohen de duhet të konstatohen nga Komisioni vlerësues gjatë hulumtimit dhe zhvillimit të një teze doktrature janë:
 - a. Duhet shmangur paragjykimi në hulumtim, ose në çdo proces ku shkencëtarët që kryejnë studimin, ndikojnë në rezultatet për të marrë një përfundim të dhënë;
 - b. Duhet shmangur nga mashtrimi,
 - c. Ndalohet plagjiatura, ose paraqitja e punës së dikujt tjetër si punë e studentit
 - d. Ndalohet trillimi ose fabrikimi i të dhënave të kërkimit, etj.
 9. Shkeljet e standardeve të ndershmerisë akademike, pa marrë parasysh sa të vogla, janë të papranueshme dhe kanë pasoja të rënda, duke u ndëshkuar deri në pezullimin ose largimin nga Universiteti.
 10. Komisioni për vlerësimin e punimit te doktoratës është i obliguar qe brenda një muaji nga emërimi ta përpilojë raportin e shkruar për vlerësimin e punimit te doktoratës. Kryetari i komisionit e përgatit raportin duke i pasur parasysh mendimet me shkrim te anëtarëve te komisionit, ndërkaq raportin e nënshkruajnë te gjithë anëtarët e komisionit. Çdo anëtarë i komisionit ka te drejte te japë vlerësim te veçuar.
 11. Komisioni për vlerësimin e punimit te doktoratës propozon:
 - 11.1. pranimin e punimit te doktoratës me deklarate eksplicite për kontributin origjinal shkencor ose kontributin artistik, ose
 - 11.2. plotësimin e punimit te doktoratës dhe vlerësimin përfundimtar, ose

11.3. refuzimin e punimit te doktoratës, pas se cilës doktoranti e humb te drejtën e arritjes se gradës doktor shkence ose artistike me atë studim.

Arsyeshmëria është pjese e domosdoshme e raportit. Ne seancën e pare te radhës, Këshilli i njësisë akademike, me propozimin e Komisionit te studimeve te doktoratës, ia propozon Senatit emërimin e komisionit për mbrojtje publike te punimit te doktoratës.

Neni 16

1. Në rast se disertacioni kthehet në plotësim apo ndryshim, këshilli i njësisë akademike cakton periudhën e përshtatshme që duhet të jetë periudhë prej së paku dy (2) muaj dhe më së shumti gjashtë (6) muaj.
2. Disertacioni i plotësuar apo i ndryshuar duhet t'i dorëzohet këshillit të njësisë akademike bashkë me mendimin e mentorit apo mentorëve.
3. Me rastin e miratimit të raportit të komisionit për vlerësim, këshilli i njësisë akademike formon komisionin për mbrojtje të doktoratës. Komisioni për mbrojtje të punimit të doktoratës përbëhet nga tre (3) anëtarë. Komisioni për mbrojtje të punimit të doktoratës mund të jetë në përbërje të njëjtë si komisioni për vlerësimin e punimit të doktoratës.
4. Vendimi i këshillit të njësisë akademike për aprovimin e disertacionit duhet të ratifikohet nga Senati.)

Procedura e mbrojtjes të punimit të doktoratës

Neni 17

1. Doktoranti mund të ketë të drejtën e mbrojtjes së tezës së doktoratës pasi:
 - Këshilli i Fakultetit ka aprovuar vlerësimin pozitiv të Komisionit të Vlerësimit të Punimit të Doktoraturës / Dorëshkrimit, të depozituar më parë në njësi akademike, së bashku me punimin të botuar në revista të pranuar,
 - tema e doktoratës qëndron e ekspozuar për një muaj tjetër të botuar për diskutim publik,
 - të miratohet nga Senati, i cili duhet të bëhet brenda dy muajve nga paraqitja në Këshillin Qendror të Studimeve të Doktoratës
 - data e saktë caktohet nga dekani i njësisë akademike në pajtim me komisionin për disertacion
 - Gjatë mbrojtjes publike të disertacionit do të mbahet procesverbali nga sekretari i komisionit i cili caktohet nga dekani i njësisë akademike.
2. Doktoranti, ne marrëveshje me dekanin e njësisë akademike dhe me komisionin për mbrojtje te punimit te doktoratës, detyrimisht duhet ta beje mbrojtjen publike te punimit te doktoratës brenda afatit prej një (1) muaji nga dita e ratifikimit ne Senat.
3. Komisioni për mbrojtje te punimit te doktoratës përbehet nga tre apo pese anëtarë. Komisioni për mbrojtje te punimit te doktoratës mund te jete ne përbërje te njëjtë si komisioni për vlerësimin e punimit te doktoratës, përveç mentorit. Mentori merr pjese ne mbrojtje te punimit te doktoratës ne anën e doktorantit, mirëpo nuk ka te drejte vendimmarrje.
4. Mbrojtja e punimit te doktoratës është publike. Thirrja për mbrojtje publike duhet te shpallet se paku tete dite para mbrojtjes ne njëren prej gazetave ditore. Mbrojtja duhet te organizohet ne hapësirën e Universitetit, gjegjësisht te njësive te saj, ne gjuhen ne te cilën është shkruar punimi i doktoratës. Ne rast te doktoratave te përbashkëta, mbrojtja

mund te organizohet ne Universitet tjetër. Procedura e mbrojtjes rregullohet me protokoll.

5. Komisioni për mbrojtje te punimit te doktoratës e bën vlerësimin menjëherë pas mbrojtjes publike te punimit te doktoratës. Vlerësimi i mbrojtjes se punimit te doktoratës mund te jete: e mbrojtji me sukses ose nuk e mbrojtji.

Vendimi merret me shumice votash te anëtarëve te komisionit për mbrojtje te punimit te doktoratës, te konstatuara me nënshkrimin e tyre.

6. Për procedurën e mbrojtjes përpilohet procesverbali ne gjuhen shqipe, e ne rast se mbrojtja behet ne gjuhe tjetër, procesverbali përpilohet edhe ne atë gjuhe.

Neni 18

1. Ne rast se rezultatet e hulumtimit te punimit te doktoratës përbejnë gjera te reja te mundshme për mbrojtje me te drejtat e pronsis intelektuale, doktoranti dhe mentori për ketë e informojnë Komisionin qendror te studimeve te doktoratës, Ne këtë rast, doktoranti, me pëlqim te mentorit, para se ta dorëzojë punimin e doktoratës për vlerësim mund te beje kërkesë qe me doktoratën e dorëzuar te veprohet ne mënyrë sekrete, deri ne momentin e mbrojtjes publike.
2. Komisioni qendror i studimeve te doktoratës e zbaton procedurën për mbrojtje juridike dhe komerciale te rezultateve te hulumtimit, ne pajtueshmëri me Ligjin për mbrojtjen e e pronsis intelektuale që rregullon fushën intelektuale. Ne këtë rast, mbrojtja publike mund te shtyhet, ne pajtim me doktorantin, me se largu për një vit, duke e llogaritur ditën e fillimit te procedurës se vlerësimit te punimit te doktoratës. Kërkesës për shtyrje te mbrojtjes publike duhet t'i bashkëngjitet vërtetimi i Shërbimit për transfer teknologjik.
3. Procedura e gjithmbarshme e vlerësimit dhe e mbrojtjes, ne rast se veprohet sipas alineve 1 dhe 2 te këtij neni, përcaktohet me akt te posaçëm te Universitetit.

Publikimi dhe ruajtja e punimit te doktoratës

Neni 19

1. Punimi i doktoratës ne tërësi publikohet ne faqet e internetit te Universitetit me se largu një muaj pas mbrojtjes. Informacioni për pjesën praktike te punimit te doktoratës nga lëmi artistik shpallet ne faqe te internetit te Universitetit me se largu një muaj pas mbrojtjes. Ne raste te jashtëzakonshme, për çka shërbimi i studimeve te doktoratës paraprakisht e bën arsyetimin, shpallja ne faqe te internetit mund te shtyhet deri ne dy vjet.
2. Punimi i doktoratës ne forme te shtypur ruhet ne arkivin e njësisë akademike, ne arkivin e Universitetit, ne Bibliotekën Universitare dhe ne Bibliotekën Kombëtare.
3. Punimi i doktoratës nga lëmi artistik ruhet, ne përputhje me llojin e veprës, ne formë adekuate (ne forme te shkruar, ne formë fotografie, videoregjistrimi, audio regjistrimi etj.) ne arkivin e njësisë akademike, ne arkivin e Universitetit, ne Bibliotekën Universitare dhe ne Bibliotekën Kombëtare, me se largu një muaj pas mbrojtjes.

Promovimi

Neni 20

1. Doktoranti e fiton te drejtën e doktorit te shkencës, te parapare me te drejtën e punës, nga dita e mbrojtjes se suksesshme te punimit te doktoratës, ndërsa te drejtat e plota te gradës akademike dhe te diplomës me rastin e promovimit, kur edhe e bën betimin dhe nënshkruhet ne librin e doktoratës shkencore ose te artit te Universitetit.
2. Doktoranti duhet qe brenda një muaji pas mbrojtjes ta plotësojë formularin për promovim ne grade doktor shkence ose arti dhe ta dorëzojë ne Shërbimin e studimeve te doktoratës te njësisë akademike punimin e doktoratës te lidhur dhe ne versionin elektronik për shpallje ne faqet e internetit te Universitetit, gjegjësisht ne forme te dokumentacionit te përshtatshëm te punimit te doktoratës ne lëmin artistik (forma e shkruar, fotografi, videoregjistrim, audio regjistrim etj.).
3. Diplomën e doktoratës ia dorëzon doktorantit Rektori ne promovimin solemn, ne te cilin doktoranti duhet te marre pjese personalisht ose ne rast te pamundësisë se pjesëmarrjes te autorizojë me shkrim person in me grade doktor shkence ose arti qe ta marre diplomën për të.

Mënyra e sigurimit të cilësisë të studimeve të doktoratës

Neni 21

1. Shërbimi i studimeve te doktoratës te njësisë akademike është i obliguar qe te kujdeset për mbajtje dhe ruajtje te shënimeve ne detaje lidhur me punimin hulumtues dhe për kryerjen e detyrave te tjera studimore te çdo doktoranti, duke nënkuptuar këtu planin e obligimeve (përgatitja e dosjes se doktorantit), mbajtjen e shënimeve për numrin e doktorantëve te regjistruar dhe numrin e doktorantëve te cilët e kane mbrojtur punimin e doktoratës,
2. Këshilli i studimeve te doktoratës për çdo vit e bën vetëvlerësimin ne baze te raporteve vjetore te mentorëve dhe te doktorantëve, e për këtë e njofton Këshillin e Fakultetit, ndërsa ky i fundit Këshillin qendror te studimeve te doktoratës dhe Senatin e Universitetit.
3. Raportit vjetor mbi vetëvlerësimin i bashkëngjitet kërkesës për ri akreditim.
4. Kriteret për vlerësim përfshijnë: produktin shkencor dhe artistik e mësimdhënësve dhe te doktorantëve, mësimdhënien, cilësinë e punimeve te doktoratës, treguesit statistikore te kohëzgjatjes se studimeve, treguesit statistikore te numrit vjetor te doktorëve te rinj ne krahasim me numrin e doktorantëve, si dhe realizimin e bashkëpunimit ndërkombëtar.

Dispozitat kalimtare dhe përfundimtare

Neni 22

- (1) Kjo rregullore hyn ne fuqi ditën e aprovimit nga Senati i UHZ-së.
- (2) Formularët janë pjese përbërëse e kësaj rregulloreje dhe me këtë rregullore është përcaktuar përdorimi i tyre.
- (3) Dispozitat e kësaj Rregulloreje ne tërësi zbatohen për studimet e doktoratës te cilat fillojnë pas hyrjes ne fuqi te kësaj Rregulloreje.

Neni 23

Për të gjitha çështjet tjera të cilat nuk janë përfshirë në këtë rregullore, do të zbatohen dispozitat e Statutit të Universitetit "Haxhi Zeka" në Pejë dhe Ligjit mbi Arsimin e Lartë në Kosovë, si dhe me aktet e tjera normative.

Neni 24

Ndryshimet dhe plotësimet e kësaj rregulloreje bëhen në të njëjtën mënyrë në të cilën është miratuar kjo rregullore.

Pejë, më 18.02.2020



Prof. Dr. Fadil Millaku
Rektor